

Na osnovu člana 19. stav 1. Zakona o Vladi Federacije Bosne i Hercegovine ("Službene novine Federacije BiH", br: 1/94, 8/95, 58/02, 19/03, 2/06 i 8/06) i člana 27. Zakona o korištenju obnovljivih izvora energije i efikasne kogeneracije ("Službene novine Federacije BiH", broj 82/23) na prijedlog federalnog ministra energije, rudarstva i industrije, Vlada Federacije Bosne i Hercegovine, donosi:

**U R E D B U**  
**O PODSTICANJU PROIZVODNJE ELEKTRIČNE ENERGIJE I OBNOVLJIVIH**  
**IZVORA ENERGIJE I EFIKASNE KOGENERACIJE I ODREĐIVANJU NAKNADA ZA**  
**PODSTICANJE**

**I PREDMET UREDBE**

**Član 1.**  
**(Djelokrug)**

Uredbom o podsticanju proizvodnje električne energije iz obnovljivih izvora energije i efikasne kogeneracije (u daljnjem tekstu: OIEiEK) i određivanje naknada za podsticanje uređuje se:

- a) klasifikacija postrojenja OIEiEK u zavisnosti od instalisane snage za postrojenja na otpad,
- b) podsticanje proizvodnje električne energije iz OIEiEK za postrojenja na otpad,
- c) način određivanja i prikupljanja naknada za podsticanje od krajnjih kupaca električne energije,
- d) način određivanja i prikupljanja naknade za podsticanje od prosumera,
- e) način raspodjele prikupljenih sredstava po osnovu naknade za podsticanje,
- f) maksimalno vrijeme izgradnje postrojenja i njegovo priključenje na mrežu, tokom kojeg će investitoru biti garantovan status potencijalnog privilegovanog proizvođača, za svaku od tehnologija definisanih u članu 6. Zakona o korištenju obnovljivih izvora energije i efikasne kogeneracije (u daljnjem tekstu: Zakon),
- g) uslovi i način sticanja, produženja, poništavanja statusa potencijalno privilegovanog proizvođača i privilegovanog proizvođača,
- h) način utvrđivanja administrativne barijere.

**Član 2.**  
**(Definicije)**

Definicije pojmova koje se koriste u ovoj uredbi imaju značenja utvrđena Zakonom, Zakonom o energiji i regulaciji energetske djelatnosti u Federaciji Bosne i Hercegovine ("Službene novine Federacije BiH", broj 60/23) i Zakonom o električnoj energiji Federacije Bosne i Hercegovine ("Službene novine Federacije BiH", broj 60/23), te propisima donesenim na osnovu ovih zakona.

**II POSTROJENJA NA OTPAD**

**Član 3.**  
**(Klasifikacija postrojenja na otpad u zavisnosti od instalisane snage)**

Klasifikacija postrojenja OIEiEK u zavisnosti od instalisane snage postrojenja koja koriste otpad te druga obnovljiva goriva:

- a) mala kogeneracijska proizvodna postrojenja instalisane snage veće do 150 kW,

b) kogeneracijska proizvodna postrojenja instalisane snage veće od 150 kW.

#### **Član 4. (Podsticanje proizvodnje električne energije za postrojenja na otpad)**

Podsticanje proizvodnje električne energije za postrojenja na otpad se vrši u skladu sa Uredbom o kvotama iz člana 24. stav (1) Zakona i Pravilnikom o efikasnoj kogeneraciji iz člana 30. stav (2) Zakona.

## **II NAČIN ODREĐIVANJA I PRIKUPLJANJA NAKNADA ZA PODSTICANJE OD KRAJNJIH KUPACA ELEKTRIČNE ENERGIJE**

#### **Član 5. (Plaćanje naknade za podsticanje)**

(1) Sredstva za podsticanje proizvodnje električne energije iz obnovljivih izvora energije i u efikasnoj kogeneraciji (u daljnjem tekstu: proizvodnja iz OIEiEK) obezbjeđuju se iz naknade za podsticanje iz OIEiEK (u daljnjem tekstu: naknada za podsticanje) koju plaćaju svi krajnji kupci električne energije u Federaciji Bosne i Hercegovine (u daljnjem tekstu: Federacija).

(2) Svi krajnji kupci električne energije u Federaciji su obavezni da plaćaju naknadu za podsticanje.

(3) Snabdjevač koji snabdijeva kupce iz Federacije je obavezan u računu koji dostavlja kupcu po osnovu isporučene i prodane električne energije, kao posebnu stavku, naznačiti jedinični iznos i iznos ukupne naknade za podsticanje.

#### **Član 6. (Obračun naknade za krajnje kupce)**

Ukupni iznos naknade za podsticanje koju plaća krajnji kupac, predstavlja proizvod jediničnog iznosa naknade u KM/kWh i ukupno izmjerene potrošnje aktivne električne energije krajnjeg kupca u obračunskom periodu izražene u kWh a izračunava se prema formuli:

$$N_{kk,m} = JN * E_{kk,m} \quad (i)$$

gdje su:

$N_{kk,m}$  iznos ukupne naknade za podsticanje koju plaća krajnji kupac, izražena u KM,  
 $JN$  jedinični iznos naknade za podsticanje izražen u KM/kWh,  
 $E_{kk,m}$  izmjerena potrošnja aktivne električne energije krajnjeg kupca u obračunskom periodu  $m$ , izražena u kWh.

#### **Član 7. (Obračun naknade za prosumere)**

(1) Ukupni iznos naknade za podsticanje koju plaća prosumer izračunava se kao razliku između preuzete i prodane električne energije iz mreže u obračunskom periodu izražene u kWh a izračunava se prema formuli:

$$N_{p,m} = JN * (ep_{p,m} - w_{p,m} - ek_{m-1}) \quad (ii)$$

gdje su:

- $N_{p,m}$  iznos ukupne naknade za podsticanje koju plaća prosumer za obračunski period  $m$ , izražena u KM,
- $JN$  jedinični iznos naknade za podsticanje izražen u KM/kWh,
- $ep_{p,m}$  dvosmjernim brojiлом izmjerena aktivna energije u smjeru od mreže prema prosumeru u obračunskom periodu  $m$ , izražena u kWh,
- $w_{p,m}$  dvosmjernim brojiлом izmjerena aktivna energije u smjeru od prosumera prema mreži u obračunskom periodu  $m$ , izražena u kWh
- $ek_{m-1}$  iznos uvijek veći od nule koji predstavlja energetska kredit određen u skladu sa članom 48. Zakona i pravilnikom iz člana 50. Zakona, izražen u kWh.

(2) Naknada za podsticanje koju plaća prosumer  $N_{p,m}$  ima vrijednost nula ako je izračunata vrijednost  $N_{p,m}$  prema stavu 1. ovog člana manja od nule.

### **Član 8. (Obaveza snabdjevača)**

(1) Snabdjevač koji snabdijeva kupce iz Federacije je obavezan da sredstva prikupljena / naplaćena po osnovu naknade za podsticanje doznači na račun Operatora za obnovljive izvore energije i efikasnu kogeneraciju (u daljnjem tekstu: Operator za OIEiEK), u skladu sa ugovorom, kojim se detaljno uređuju sva međusobna prava i obaveze.

### **Član 9. (Određivanje potrebnog iznosa naknade za podsticanje)**

(1) Iznos ukupne naknade potreban za podsticanje  $NP$  i jedinični iznos naknade  $JN$  iz člana 6. i člana 7. stav (1) ove uredbe, za svaku narednu godinu do 31.12. tekuće godine, se utvrđuju Odlukom o utvrđivanju potrebnog iznosa naknade i jediničnog iznosa naknade za podsticanje proizvodnje električne energije iz OIEiEK.

(2) Odluku iz stava (1) ovog člana donosi Vlada Federacije Bosne i Hercegovine (u daljnjem tekstu: Vlada Federacije), a na prijedlog Federalnog ministarstva energije, rudarstva i industrije (u daljnjem tekstu: Ministarstvo).

(3) Odluka iz stava (1) ovog člana Vlada Federacije donosi na osnovu:

- a) utvrđenih garantovanih cijena otkupa električne energije proizvedene u postrojenjima, OIEiEK kojima je odobrena ta mjera podsticaja,
- b) utvrđene referentne cijene,
- c) dodjeljenih premija za električnu energiju proizvedenu u postrojenjima OIEiEK,
- d) udjela planiranog ukupnog iznosa naknade za podsticanje koji je namijenjen za jednokratno sufinansiranje izgradnje postrojenja prosumera iz kategorije domaćinstvo,
- e) planiranih i odobrenih troškova rada Operatora za OIEiEK,
- f) planirane proizvodnje iz obnovljivih izvora i u efikasnoj kogeneraciji,
- g) planirane neto potrošnje električne energije u Federaciji,
- h) procjene salda ukupno prikupljenih/naplaćenih sredstava kroz naknadu za podsticanje i isplaćenih sredstava za podsticanje u prethodnoj godini.

(4) Potreban iznos naknade za podsticanje  $NP$  izražen u KM i jedinični iznos naknade  $JN$  izražen u KM/kWh iz stava (1) ovog člana određuju se na slijedeći način:

$$NP_n = (SP_n + TOP_n) * (1 + fpp) \pm \Delta SPI_{n-1} \quad (\text{iii})$$

$$JN_n = \frac{NP_n}{NetoP_{ee,n}} \quad (\text{iv})$$

gdje su:

- $NP_n$  ukupan iznos naknade za podsticanje izražen u KM,  
 $SP_n$  ukupan iznos sredstava izražen u KM potreban za isplatu podsticajnog dijela za energiju proizvedenu od strane privilegovanih proizvođača u skladu sa članom 66. stav (1) Zakona ili na osnovu zaključenih ugovora o otkupu i za isplatu premije za električnu energiju proizvedenu od strane privilegovanih proizvođača na osnovu ugovora o fiksnoj premiji, u n-toj godini, određenih aukcijom,  
 $TOP_n$  troškovi rada i ostali troškovi Operatora za OIEiEK izražen u KM,  
 $\Delta SPI_{n-1}$  procijenjeni bilansni saldo ukupno prikupljenih sredstava kroz naknadu za podsticanje i ukupno utrošenih sredstava iz naknade u protekloj godini, izražen u KM,  
 $n$  godina za koju se određuje naknada za podsticanje,  
 $fpp$  iznos u visini od najmanje 10% od planiranog ukupnog iznosa naknade za podsticanje u skladu sa članom 52. stav (1) Zakona, izražen kao decimalni postotak,  
 $JN_n$  jedinični iznos naknade, izražen u KM/kWh  
 $NetoP_{ee,n}$  neto potrošnja električne energije na koju se obračunava naknada za podsticanje za godinu  $n$  čija vrijednost se određuje metodologijom iz člana 12. stava (4) ove uredbe.

(5) Operator za OIEiEK, zaključno sa 30. novembrom tekuće godine, vrši izračun i Ministarstvu dostavlja:

- procjenu ukupnih sredstava potrebnih  $SP_n$  za isplatu podsticajnog dijela za energiju proizvedenu od strane privilegovanih proizvođača u skladu sa članom 66. stav (1) Zakona ili na osnovu zaključenih ugovora o otkupu i za isplatu premije za električnu energiju proizvedenu od strane privilegovanih proizvođača na osnovu ugovora o fiksnoj premiji, određenih aukcijom za godinu koja slijedi, izraženih u KM,
- procjenu troškova rada i ostalih troškova Operatora za OIEiEK  $TOP_n$  za godinu koja slijedi, izraženu u KM,
- procjenu salda ukupno prikupljenih i isplaćenih sredstava od naknade za podsticanje  $\Delta SPI_{n-1}$  u godini koja prethodi godini za koju se određuje naknada za podsticanje,
- procjenu neto potrošnje električne energije  $NetoP_{ee,n}$  na koju se obračunava naknada za podsticanje u Federaciji za godinu za koju se određuje naknada za podsticanje, izraženu u GWh,
- iznos parametra  $fpp$  iz stava (4) ovog člana.

(6) Operator za OIEiEK, dostavlja Ministarstvu mjesečne i godišnje podatke o:

- ukupnoj električnoj energiji koja je isporučena i prodana kupcima u Federaciji,
- ukupnim novčanim sredstvima fakturisanim/naplaćenim po osnovu naknade za podsticanje kupcima u Federaciji,
- ukupnoj električnoj energiji otkupljenoj od privilegovanih proizvođača,

d) ukupnim novčanim iznosima fakturisanim/naplaćenim od svake kategorije privilegovanih proizvođača za isporučenu i prodatu električnu energiju u Federaciji.

### Član 10.

#### (Procjena godišnjih troškova za sistem podsticanja proizvodnje privilegovanih i potencijalno privilegovanih proizvođača)

Iznos ukupnih sredstava ( $SP_n$ ) potrebnih za sistem podsticanja proizvodnje svih privilegovanih proizvođača u narednoj godini uključujući i troškove podsticanja potencijalnih privilegovanih proizvođača čija se proizvodnja planira u narednoj godini, obračunava se prema sljedećoj formuli:

$$SP_n = \sum_{i=1}^p EGOC_i^{2014,pp} * (GOC_i^{2014} - OC_n) + \sum_{j=1}^q EGOC_j^{2023,pp} * (GOC_j^{2023} - ZOC_n) + \sum_{k=1}^r EFIP_k^{2023,pp} * P_k$$

gdje je:

- $n$  godina na koju se odnosi izračun potrebnih sredstava sistema podsticanja  $SP_n$ ,
- $i, j, k$  označavaju korištene indekse,
- $p$  označava broj privilegovanih proizvođača sa ugovorom o otkupu električne energije koji su svoj status stekli u skladu sa Zakonom o korištenju obnovljivih izvora energije i efikasne kogeneracije („Službene novine FBiH“, broj:70/13 i 05/14), evidentiranih u bazi podataka Operatora za OIEiEK, koji će biti na snazi u godini  $n$ ,
- $q$  označava broj privilegovanih proizvođača sa ugovorom o otkupu električne energije za mala postrojenja nakon sprovedene FIT aukcije, koji su svoj status stekli u skladu sa Zakonom, evidentiranih u bazi podataka Operatora za OIEiEK, koji će biti na snazi u godini  $n$ ,
- $r$  označava broj privilegovanih proizvođača koji su svoj status stekli u skladu sa Zakonom, sa zaključenim ugovorom o dodjeli fiksne premije za velika postrojenja nakon sprovedene FIP aukcije, evidentiranih u bazi podataka Operatora za OIEiEK, koji će biti na snazi u godini  $n$ ,
- $EGOC_i^{2014,pp}$  označava električnu energiju izraženu u MWh koja se očekuje da će u godini  $n$  biti isporučena od strane privilegovanih proizvođača koji su svoj status stekli u skladu sa Zakonom o korištenju obnovljivih izvora energije i efikasne kogeneracije („Službene novine FBiH“, broj:70/13 i 05/14) i imaju zaključen ugovor o otkupu električne energije,
- $GOC_i^{2014}$  označava garantovanu otkupnu cijenu u skladu s ugovorom o otkupu električne energije koji je zaključen s Operatorom za OIEiEK, važeću za godinu  $n$ , izraženu u KM/MWh, koja se plaća privilegovanim proizvođačima koji su svoj status stekli u skladu sa Zakonom o korištenju obnovljivih izvora energije i efikasne kogeneracije („Službene novine FBiH“, broj:70/13 i 05/14),
- $OC_n$  označava otkupnu cijenu koja poprima vrijednost manjega između Referentne cijene za godinu  $n$  (dalje: RC) i garantovne otkupne cijene  $GOC_i^{2014}$  važeće za godinu  $n$ ,

- $EGOC_j^{2023,pp}$  označava električnu energiju izraženu u MWh koja se očekuje da će u godini  $n$  biti isporučena od strane privilegovanih proizvođača koji su svoj status stekli u skladu sa Zakonom i imaju zaključen ugovor o otkupu električne energije,
- $GOC_j^{2023}$  označava garantovanu otkupnu cijenu u skladu s ugovorom o otkupu električne energije koji je zaključen s Operatorom za OIEiEK i Zakonom, važeću za godinu  $n$ , izraženu u KM/MWh, koja se plaća privilegovanim proizvođačima koji su svoj status stekli u skladu sa Zakonom ili će se plaćati potencijalnim privilegovanim proizvođačima kada steknu status privilegovanog proizvođača,
- $ZOC_n$  označava otkupnu cijenu koja do uspostave organizovanog dan unaprijed tržišta električne energije u Bosni i Hercegovini poprima vrijednost manjega između Zamjenske tržišne cijene za godinu  $n$  (dalje: ZTC) i garantovne otkupne cijene  $GOC_j^{2023}$  važeće za godinu  $n$ ,
- $EFIP_k^{2023,pp}$  označava električnu energiju izraženu u MWh koja se očekuje da će u godini  $n$  biti isporučena od strane privilegovanih proizvođača sa ugovorom o dodjeli fiksne premije koji su svoj status stekli u skladu sa Zakonom,
- $P_k$  označava premiju utvrđenu FIP aukcijom izraženu u KM/MWh koja se plaća privilegovanom proizvođaču električne energije u skladu sa ugovorom o dodjeli fiksne premije i Zakonom, važeću u godini  $n$ .

### Član 11.

#### (Obračun operativnih troškova Operatora za OIEiEK)

- (1) Operator za OIEiEK dostavlja Ministarstvu procijenjene godišnje troškove rada i ostale troškova za narednu godinu.
- (2) Ministarstvo vrši analizu procjene troška iz stava (1) ovog člana i daje suglasnost na potrebna sredstava.
- (3) Vlada Federacije, na prijedlog Ministarstva, odlukom daje saglasnost na iznos sredstava iz stava (2) ovog člana.
- (4) Odluka iz stava (3) ovog člana objavljuje se u "Službenim novinama Federacije BiH".

### Član 12.

#### (Procjena ukupne i neto potrošnje električne energije u Federaciji)

- (1) Operator za OIEiEK, u saradnji sa Ministarstvom, najkasnije do 30. novembra tekuće godine, priprema i izrađuje plan ukupne potrošnje i neto potrošnje električne energije na teritoriji Federacije za narednu godinu.
- (2) Plan iz stava (1) ovog člana mora biti usklađen sa Bilansom energetske potreba Federacije za narednu godinu.
- (3) Operator za OIEiEK vrši obračun i procjenu ukupnih sredstava (troška) po osnovu naknade za podsticanje, a koju svaki snabdjevač treba prikupiti i uplatiti na račun Operatora za OIEiEK.

(4) Procjenu neto potrošnje električne energije na koju se obračunava naknada za podsticanje  $NetoP_{ee,n}$  iz člana 9. stav (4) Operator za OIEiEK, na osnovu podataka dobijenim od snabdjevača korištenjem slijedeće formule:

$$NetoP_{ee,n} = K_{n-1} * I_n + EP_{n-1} - W_{n-1} - \frac{\Delta P_{S,n}}{2} * FLH, \text{ ako je } EP_{n-1} \geq W_{n-1} \quad (v)$$

$$NetoP_{ee,n} = K_{n-1} * I_n - \frac{\Delta P_{S,n}}{2} * FLH, \text{ ako je } EP_{n-1} < W_{n-1} \quad (vi)$$

gdje su:

- $K_{n-1}$  ukupna potrošnje krajnjih kupaca u Federaciji (koji nisu u statusu prosumera) u godini koja prethodi godini za koju se radi procjena, izražena u kWh,
- $I_n$  indeks očekivanog porasta potrošnje u godini za koju se radi procjena (godina n), izražen kao decimalni indeks,
- $EP_{n-1}$  ukupna aktivna energije u smjeru od mreže prema svim prosumerima u Federaciji u prethodnih 12 mjeseci, izražena u kWh,
- $W_{n-1}$  ukupna aktivna energije u smjeru od svih prosumera u Federaciji prema mreži u prethodnih 12 mjeseci, izražena u kWh,
- $\Delta P_{S,n}$  ukupna instalirana snaga solarnih elektrana kod svih prosumera u Federaciji koja se prema planovima očekuje da će biti instalirana u godini n, izražena u kW,
- $FLH$  očekivani ekvivalentni sati nazivnog pogona za solarne elektrane prosumera u godini n koji se za potrebe ovog stava uzima da iznosi 1600,

### III NAČIN RASPODJELE PRIKUPLJENIH SREDSTAVA OD NAKNADE ZA PODSTICANJE

#### Član 13.

#### (Fakturisanje i naplata naknade za podsticaj i garancije od snabdjevača)

- (1) Fakturisanje i naplatu naknade za podsticaj od krajnjih kupaca u Federaciji vrši:
  - a) odabrani snabdjevač za kupce koji su odabrali svog snabdjevača i imaju zaključen ugovor o snabdijevanju, a nisu u sistemu javnog snabdijevanja, odnosno pružanja univerzalne usluge,
  - b) rezervni snabdjevač koji je preuzeo snabdijevanje onih kupaca koje je njihov odabrani snabdjevač prestao da snabdijeva,
  - c) javni snabdijevač, za kupce koji su u sistemu javnog snabdijevanja, odnosno pružanja univerzalne usluge.
- (2) Subjekti iz stava (1) ovog člana su obavezni na račun Operatora za OIEiEK doznačiti prikupljena sredstva od naknade za podsticanje, najkasnije do 25. u mjesecu za prethodni mjesec.
- (3) Operator za OIEiEK, do 30. novembra tekuće godine, obračunava za narednu godinu iznos instrumenta garancije koji će se preciznije definisati ugovorom o međusobnim odnosima koji su snabdjevači obavezni zaključiti sa Operatorom za OIEiEK.

(4) Instrument garancije iz stava (3) ovog člana se uvodi s ciljem obezbjeđivanja naplate sredstava po osnovu naknade za podsticanje.

#### **Član 14. (Raspodjela sredstava od naknade za podsticaj)**

- (1) Sredstva prikupljena od naknade za podsticanje su prihod Operatora za OIEiEK.
- (2) Operator za OIEiEK raspolaže sredstvima iz stava (1) ovog člana i koristi ih za:
- a) isplatu razlike između garantovane cijene određene ugovorom o otkupu i referentne cijene privilegovanim proizvođačima u skladu sa članom 66. stav (1) Zakona,
  - b) isplatu razlike između cijene određene u FIT aukciji, koja je navedena u ugovoru o otkupu i zamjenske tržišne cijene privilegovanim proizvođačima,,
  - c) isplatu premije određene u FIP aukciji, privilegovanim proizvođačima, u skladu sa Zakonom i ovom uredbom,
  - d) finansiranje troškova rada Operatora za OIEiEK iz člana 11. ove uredbe,
  - e) finansiranje provedbe Programa za jednokratno sufinansiranje izgradnje postrojenja prosumera iz kategorije domaćinstva.

#### **Član 15. (Inicijativa za promjenu visine naknade)**

(1) Ako procjeni da prikupljena sredstva po osnovu naknade za podsticanje nisu dovoljna za pokrivanje troškova navedenih u članu 10. ove uredbe, Operator za OIEiEK može Ministarstvu podnijeti inicijativu za promjenu visine naknade za podsticanje.

(2) Uz inicijativu iz stava (1) ovog člana Operator za OIEiEK dostavlja i detaljan izvještaj o prikupljenim i utrošenim sredstvima po osnovu naknade do trenutka podnošenja zahtjeva sa projekcijom do kraja tekuće godine.

(3) Ministarstvo analizira opravdanost inicijative iz stava (1) ovog člana i, ukoliko je ista opravdana, Ministarstvo, u roku od 15 dana od dana podnošenja inicijative, Vladi Federacije dostavlja prijedlog za korekciju visine naknade za podsticanje.

#### **Član 16. (Izvještavanje)**

(1) Operator za OIEiEK je dužan da, najkasnije do kraja februara tekuće godine, sačini i objavi na svojoj službenoj internet stranici detaljan izvještaj o prikupljenim i utrošenim sredstvima iz naknade za podsticanje u prethodnoj godini.

Izvještaj iz stava (1) ovog člana, između ostalog, treba da sadrži podatke:

- a) o ukupnoj prikupljenoj naknadi za podsticanje od strane snabdjevača,
- b) naziv svakog privilegovanog proizvođača, vrsti, tipu i instalisanoj snazi postrojenja, vrsti podsticaja, proizvedenoj i otkupljenoj električnoj energiji od privilegovanih proizvođača,
- c) o ukupno isplaćenim sredstvima za otkupljenu električnu energiju sa iskazivanjem sredstva koja se isplaćuju po osnovu podsticanja proizvodnje privilegovanog proizvođača,
- d) troškove rada i ostale troškove Operatora za OIEiEK,
- e) utrošena sredstva po Programu o sufinansiranju prosumera iz kategorije domaćinstva.

#### **IV USLOVI I NAČIN STICANJA, PRODUŽENJA, PONIŠTAVANJA STATUSA POTENCIJALNO PRIVILEGOVANOG PROIZVOĐAČA I PRIVILEGOVANOG PROIZVOĐAČA**

##### **Član 17.**

##### **(Uslovi i način sticanja statusa potencijalnog privilegovanog proizvođača)**

- (1) Ponuditelji FIT ili FIP aukcije koji su na temelju odluke Operatora za OIEiEK proglašeni dobitnicima aukcije stječu status potencijalnog privilegovanog proizvođača te pravo da zaključe predugovor o otkupu električne energije ili predugovor o dodjeli fiksne premije sa Operatorom za OIEiEK.
- (2) Predugovor o otkupu električne energije i predugovor o dodjeli premije se zaključuje u skladu sa Zakonom, zakonom kojim se uređuju obligacioni odnosi i ovom uredbom.
- (3) Operator za OIEiEK će u roku od 15 dana od donošenja rješenja iz stava (1) ovog člana svim sudionicima dostaviti odluku o ishodu aukcija te uz to dobitnim ponuditeljima poslati potpisani predugovor o otkupu električne energije po garantovanim otkupnim cijenama odnosno predugovor o dodjeli fiksne premije.
- (4) Dobitni sudionik aukcije će u roku od 15 dana nakon zaprimanja odluke i ugovora iz stava (3) ovog člana vratiti Operatoru za OIEiEK valjano potpisani i ovjereni predugovor o otkupu električne energije ili predugovor o dodjeli fiksne premije.
- (5) U slučaju da Operator za OIEiEK u roku iz stava (4) ovog člana ne zaprimi potpisani predugovor o otkupu električne energije odnosno potpisani predugovor o fiksnoj premiji, Operator za OIEiEK će dati dodatni rok od 10 dana za potpisivanje i ovjeru predugovora o otkupu električne energije odnosno predugovora o fiksnoj premiji.
- (6) Ako ni u dodatnom roku Operator za OIEiEK ne zaprimi valjano potpisane predugovore o otkupu električne energije odnosno predugovore o fiksnoj premiji, Operator za OIEiEK će aktivirati naplatu instrumente garancije iz člana 33. ili člana 36. Zakona.

##### **Član 18.**

##### **(Uslovi za produženje statusa potencijalno privilegovanog proizvođača)**

- (1) Period trajanja predugovora određen je ovisno o tehnologiji za koju je sklopljen predugovor, a u skladu sa članom 27. ove uredbe.
- (2) Produženje statusa potencijalno privilegovanog proizvođača moguće je jedino u slučaju da se utvrdi postojanje administrativne barijere sukladno ovoj uredbi, i to za rok koji je utvrđen rješenjem o utvrđivanju administrativne barijere iz člana 30. ove uredbe.
- (3) U slučaju iz stava (2) ovog člana, dodatak ugovora mora biti sklopljen prije isteka perioda trajanja predugovora o otkupu električne energije po garantovanim otkupnim cijenama ili predugovora o dodjeli fiksne premije.
- (4) U slučaju iz stava (2) ovog člana, potencijalno privilegovani proizvođač će produljiti valjanost instrumenata garancije iz člana 33. ili člana 36. Zakona do minimalno 30 dana iza novog roka za sticanje statusa privilegovanog proizvođača.

## **Član 19.** **(Poništavanje statusa potencijalno privilegovanog proizvođača)**

- (1) Status potencijalno privilegovanog proizvođača poništava se u sljedećim slučajevima:
- a) ukoliko potencijalno privilegovani proizvođač ne zaključi predugovor o otkupnoj cijeni električne energije odnosno predugovor o fiksnoj premiji s Operatorom za OIEiEK u roku od 40 dana od donošenja rješenja iz člana 38. Zakona,
  - b) ukoliko nastupe okolnosti prema članu 44. stav (4) i član 45. stav (4) Zakona,
  - c) u slučaju prestanka ispunjavanja uvjeta na temelju kojih je u aukcijskom postupku potencijalni privilegovani proizvođač izabran kao dobitnik,
  - d) u slučaju da se naknadno utvrdi da je potencijalno privilegovani proizvođač svoj status stekao na temelju neistinitih podataka,
  - e) u slučaju da potencijalno privilegovani proizvođač nije produžio valjanost instrumenta garancije barem 30 dana prije isteka njegova roka ako istek instrumenta garancije pada u periodu trajanja predugovora o otkupu električne energije ili predugovora o fiksnoj premiji,
  - f) u slučaju kršenja drugih odredbi predugovora o otkupu električne energije ili predugovora o dodjeli fiksne premije,
  - g) na temelju zahtjeva potencijalnog privilegovanog proizvođača za raskidom ugovora
  - h) neispunjavanja uvjeta za poslovanje po drugim propisima ili ako mu bude izrečena mjera zabrane obavljanja djelatnosti.

(2) U slučaju poništavanja statusa potencijalno privilegovanog proizvođača na temelju neke od okolnosti iz stava 1. ovog člana, Operator za OIEiEK će aktivirati naplatu instrumente garancije iz člana 33. ili člana 36. Zakona.

## **Član 20.** **(Uslovi za sticanje statusa privilegovanog proizvođača)**

- (1) Pravo na stjecanje statusa privilegovanog proizvođača električne energije, ima kvalifikovani proizvođač električne energije iz OIEiEK, koji:
- a) je prethodno stekao status potencijalno privilegovanog proizvođača,
  - b) ima važeći predugovor o otkupu električne energije po garantovanim otkupnim cijenama ili predugovor o dodjeli fiksne premije sa Operatorom za OIEiEK,
  - c) je u propisanom roku izgradio postrojenje te posjeduje Dozvolu za rad Regulatorne komisije (ukoliko za to postoji zakonska obveza) i rješenje o stjecanju statusa kvalificiranog proizvođača, a u skladu sa klasifikacijom iz člana 6. stava (2) Zakona,
  - d) je ispunio i trajno ispunjava uslov energetske vrijednosti osnovnog goriva u postrojenju za biomasu ili biogas na način propisan članom 21. ove uredbe.

(2) Status privilegovanog proizvođača utvrđuje se u skladu sa procedurom i na način propisan članom 39. Zakona i ovom uredbom.

## **Član 21.** **(Energetske vrijednosti osnovnog goriva u postrojenjima za biomasu/biogas)**

(1) U postrojenju na biomasu iz člana 20. ove uredbe energetska vrijednost osnovnog goriva, na godišnjem nivou mora iznositi najmanje 80% ukupne energetske vrijednosti utrošenog primarnog goriva.

(2) U postrojenju na biogas iz člana 20. ove uredbe energetska vrijednost osnovnog goriva, odnosno korištenog obnovljivog izvora energije, mora iznositi najmanje 90% ukupne energetske vrijednosti utrošenog primarnog goriva.

(3) U elektranama iz st. (1) i (2) ovog člana kao dopunsko gorivo može se koristiti fosilno gorivo, otpadni tehnološki gasovi sa organskom frakcijom ili neki drugi obnovljivi izvor energije.

## **Član 22.** **(Način sticanje statusa privilegovanog proizvođača)**

(1) Pravna i fizička lica kojima je utvrđen status kvalifikovanog proizvođača u skladu sa članom 26. stav (2) Zakona te ispunjava uslove iz člana 20. ove uredbe zahtjev za sticanje statusa privilegovanog proizvođača podnose Operatoru za OIEiEK na obrascu OZSSPP-2 - Zahtjev za sticanje statusa privilegovanog proizvođača električne energije, a koji je sastavni dio ove uredbe i nalazi se u prilogu.

(2) Uz zahtjev iz stava (1) ovog člana, podnosilac zahtjeva dostavlja dokaze o ispunjenosti uslova za sticanje statusa privilegovanog proizvođača, i to:

- a) ovjerenu kopiju Dozvole za rad-licence za obavljanje djelatnosti proizvodnje električne energije (ukoliko za to postoji zakonska obveza),
- b) ovjerenu kopiju rješenja o sticanju statusa kvalifikovanog proizvođača,
- c) ovjerenu kopiju upotrebne dozvole za postrojenje koje je predmet zahtjeva,
- d) ovjerenu kopiju akta o priključenju na prenosni odnosno distributivni sistem, sa potvrdom nadležnog operatora da je mjerno mjesto postrojenja koje je predmet zahtjeva, izvedeno u skladu sa važećim propisima i pravilima koji regulišu ovu oblast,
- e) ovjerenu kopiju ugovora o prodaji toplotne energije, odnosno potvrdu podnosioca zahtjeva da se proizvedena toplotna energija koristi za vlastite potrebe, ukoliko se zahtjev odnosi na kogeneracijsko postrojenje,
- f) ovjerenu kopiju dijela Glavnog projekta u kojoj je proračunat stepen korisnosti postrojenja ukoliko se radi o kogeneracijskom postrojenju,
- g) ovjerenu izjavu o svim dobivenim državnim podsticajima ili državnoj pomoći u svrhu izvršenja člana 27. stava (8) Zakona,
- h) podatke o licu/licima odgovornom za rad elektrane (ime, funkcija, telefon, faks, e-mail).

(3) O zahtjevu iz stava (1) Operator za OIEiEK odlučuje rješenjem u skladu s članom 39. stav (3) Zakona.

(4) Ukoliko rješavajući po zahtjevu iz stava (1) ovoga člana Operator za OIEiEK donese pozitivnu odluku, privilegovani proizvođač ima pravo da sa Operatorom za OIEiEK zaključi ugovor o otkupu električne energije u malim postrojenjima koja koriste energiju sunčevog zračenja, energiju vjetra, energiju biomase ili biogasa, ili ugovor o dodjeli premije za velika postrojenja koja koriste obnovljive izvore ili u efikasnoj kogeneraciji.

(5) Prava i obaveze privilegovanog proizvođača i Operatora za OIEiEK, a tokom podsticajnog perioda, uređuju se ugovorom o otkupu proizvedene električne energije za mala postrojenja ili ugovorom o dodjeli premije za velika postrojenja, iz stava (4) ovog člana, koji se zaključuju u pisanoj formi.

(6) Sadržaj ugovora iz stava (4) ovog člana utvrđuje se u skladu sa Zakonom, zakonom kojim se uređuju obligacioni odnosi i ovom uredbom, a sadrži naročito:

- a) ugovorne strane i kategoriju privilegovanog proizvođača,
- b) predmet ugovora, datum sklapanja i datum prestanka ugovora,
- c) period trajanja ugovora,
- d) mjesto kupoprodaje energije,
- e) mjesto i način mjerenja,
- f) način utvrđivanja gubitaka između mjesta kupoprodaje i mjesta mjerenja, ukoliko se ne nalaze na istom mjestu,
- g) način davanja prigovora na očitane vrijednosti,
- h) način utvrđivanja proizvodnje u slučaju kvara mjernog uređaja,
- i) garantovanu otkupnu cijenu, odnosno premiju za električnu energiju,
- j) tehnički podaci o postrojenju i planiranoj proizvodnji,
- k) odstupanje od prijavljenog plana proizvodnje,
- l) obaveze u pogledu dostavljanja podataka,
- m) ugovornu kaznu,
- n) način i dinamiku obračunavanja, fakturisanja i plaćanja,
- o) kamatu u slučaju neblagovremenog plaćanja,
- p) način obezbjeđenja garancije plaćanja,
- r) način komunikacije ugovornih strana,
- s) obaveze Operatora za OIEiEK u pogledu preuzimanja balansne odgovornosti i privilegovanog proizvođača u pogledu planiranja rada elektrane,
- t) obaveze privilegovanog proizvođača u pogledu izdavanja i prijenosa garancija porijekla na snabdjevača,
- u) spisak podataka čija se tajnost garantuje,
- v) odgovornost za nastanak štete,
- z) način i mjesto arbitraže,
- aa) spisak događaja koji se smatraju višom silom u skladu sa važećim aktima,
- bb) razloge privremenog prekida i uslove nastavka ugovora,
- cc) razloge i uslove trajnog raskida ugovora,
- dd) uslove prijenosa prava i obaveza iz ugovora na treća lica.

(7) Ugovori iz stava (4) ovog člana zaključuje na period od 12 godina od dana sticanja statusa privilegovanog proizvođača.

(8) Operator za OIEiEK propisuje standardne modele ugovora.

(9) Ugovor o otkupu električne energije može odstupiti od standardnih modela ugovora iz stava (8) ovog člana, uz obostranu saglasnost ugovornih strana i uz prethodno pribavljenu saglasnost Ministarstva u pisanoj formi.

(10) Ugovor o dodjeli premije može odstupiti od standardnih modela ugovora iz stava (8) ovog člana, uz obostranu saglasnost ugovornih strana i uz prethodno pribavljenu saglasnost Ministarstva u pisanoj formi.

**Član 23.**  
**(Podnošenje zahtjeva u slučaju većeg broja postrojenja)**

(1) Kvalifikovani proizvođač koji obavlja djelatnost proizvodnje električne energije u više postrojenja iz člana 6. stava (2) Zakona podnosi zahtjev za sticanje statusa privilegovanog proizvođača za svako postrojenje/elektranu posebno na način propisan članom 22. ove uredbe.

**Član 24.**  
**(Uslovi za produženje statusa privilegovanog proizvođača )**

(1) Status privilegovanog proizvođača ne može se produžiti nakon isteka perioda na koji je sklopljen ugovor o otkupu električne energije odnosno ugovor o fiksnoj premiji.

(2) Ukoliko je ugovor o otkupu električne energije ili ugovor o fiksnoj premiji istekao ili je isti raskinut, ponovno potpisivanje ugovora i povratak u sistem podsticanja za postrojenje za koje je ugovor istekao ili raskinut nije moguće.

**Član 25.**  
**(Poništavanje statusa privilegovanog proizvođača)**

(1) Status privilegovanog proizvođača poništava se u sljedećim slučajevima:

- a) u slučaju prestanka ispunjavanja uslova na osnovu kojih je u aukcijskom postupku privilegovani proizvođač izabran kao dobitnik,
- b) u slučaju gubitka statusa kvalifikovanog proizvođača,
- c) u slučaju da se naknadno utvrdi da je privilegovani proizvođač svoj status stekao na osnovu neistinitih podataka,
- d) u slučaju kršenja drugih odredbi ugovora o otkupu električne energije ili ugovora o dodjeli fiksne premije,
- e) na osnovu zahtjeva potencijalnog privilegovanog proizvođača za raskidom ugovora,
- f) neispunjavanja uslova za poslovanje po drugim propisima ili ako mu bude izrečena mjera zabrane obavljanja djelatnosti.

(2) U slučaju poništavanja statusa privilegovanog proizvođača na osnovu neke od okolnosti iz stava 1. ovog člana aktivirati će se raskidne klauzule iz ugovora o otkupu električne energije ili ugovora o fiksnoj premiji.

**Član 26.**  
**(Odbijanje statusa privilegovanog proizvođača)**

Operator za OIEiEK može odbiti zahtjev investitora za sticanje statusa privilegovanog proizvođača, u skladu sa članom 39. Zakona i ove uredbom, za slučaj ako planirano postrojenje ne zadovoljava kriterije ukupno potrebnog vremena za njegovu izgradnju i priključenje na elektroenergetsku mrežu.

**V ODREĐIVANJE MAKSIMALNOG VREMENA ZA IZGRADNJU I PRIKLJUČENJE NA MREŽU UZ GARANTOVANJE STATUSA POTENCIJALNOG PRIVILEGOVANOG PROIZVOĐAČA**

**Član 27.**  
**(Određivanje vremena za izgradnju i priključak)**

(1) U slučaju kada investitor rješenjem Operatora za OIEiEK ostvari pravo na status potencijalnog privilegovanog proizvođača, i pravo da sa Operatorom za OIEiEK zaključi predugovor o otkupu električne energije ili predugovor o dodjeli premije za električnu energiju proizvedenu iz OIEiEK, potencijalni privilegovani proizvođač je dužan izvršiti izgradnju postrojenja i priključak na elektroenergetsku mrežu u vremenu naznačenom u predugovoru ili u dodatnom vremenu u slučaju utvrđene administrativne barijere.

### **Član 28. (Određivanje vremena za izgradnju postrojenja po tehnologijama i veličini postrojenja)**

Zavisno od tehnologije koja se koristi vrijeme potrebno za izgradnju, priključenje postrojenja na mrežu i dobijanje upotrebne dozvole iznosi:

- a) najviše 4 godine za vjetroelektranu,
- b) najviše 3 godine za solarnu fotonaponsku elektranu,
- c) najviše 5 godina za geotermalnu elektranu,
- d) najviše 4 godine za sve ostale tehnologije koje su navedene u članu 6. stavu (2) Zakona.

### **Član 29. (Izgradnja postrojenja u fazama)**

Vremenski rokovi za izgradnju i priključivanje na mrežu koji su definisani u članu 28. ove uredbe, odnose se za svaku fazu projekta, što će se tretirati kao zasebna postrojenja u svrhu sticanja statusa privilegovanog proizvođača.

## **VI UTVRĐIVANJE ADMINISTRATIVNE BARIJERE**

### **Član 30. (Način utvrđivanja administrativne barijere)**

(1) Ukoliko se potencijalno privilegirani proizvođač suoči sa administrativnom barijerom koja mu onemogućava da završi izgradnju postrojenja i priključak na elektroenergetsku mrežu u vremenu naznačenom u predugovoru, može se obratiti Operatoru za OIEiEK sa zahtjevom za utvrđivanje administrativne barijere.

(2) Zahtjev za utvrđivanje administrativne barijere sadrži jasno opisane razloge i podatke o postupku i nadležnom organu pred kojim teče postupak čije trajanje efektivno onemogućava završetak izgradnje postrojenja i priključka na elektroenergetsku mrežu u vremenu naznačenom u predugovoru.

(3) Nakon zaprimljenog zahtjeva za utvrđivanje administrativne barijere Operator za OIEiEK može, ukoliko smatra da podneseni zahtjev ne sadrži dovoljno informacija za utvrđivanje postojanja administrativne barijere, zatražiti od nadležnog organa koji vodi predmetni postupak informaciju o trenutnom statusu predmeta za koji podnosilac zahtjeva smatra da predstavlja administrativnu barijeru.

(4) Prilikom utvrđivanja administrativne barijere, Operator za OIEiEK posebno cijeni:

- a) da li je podnosilac zahtjeva svojim pasivnim držanjem kao što je nekompletna dokumentacija ili oglašavanje na opravdane zahtjeve postupajućem organu u zadanim rokovima, doprinio dužem trajanju predmetnog postupka, i
- b) brzinu kojom je nadležni organ postupao u konkretnom slučaju u odnosu na uobičajeno trajanje postupka pred nadležnim organom.

(5) Ukoliko ocijeni zahtjev opravdanim, Operator za OIEiEK, uz prethodno pribavljenu saglasnost, donosi rješenje kojim utvrđuje da postoji administrativna barijera.

(6) Rješenje iz stava (6) ovog člana je konačno i protiv njega se može pokrenuti upravni spor pred nadležnim sudom.

### **Član 31.**

#### **(Djelovanje nakon utvrđene administrativne barijere)**

(1) Rješenjem o utvrđivanju administrativne barijere se utvrđuje rok za koji se može produžiti trajanje predugovora.

(2) U slučaju iz prethodnog stava Operator za OIEiEK i potencijalno privilegirani proizvođač zaključuju izmjene i dopune predugovora u dijelu koji se odnosi na period.

## **VII PRELAZNE I ZAVRŠNE ODREDBE**

### **Član 32.**

#### **(Upravni nadzor)**

(1) Upravni nadzor obuhvata nadzor nad primjenom odredbi ove redbe i nadzor nad obavljanjem poslova određenih ovom uredbom. Ovo ne isključuje i saradnju sa drugim nadležnim organima i organizacijama.

### **Član 33.**

#### **(Usklađivanje s strateškim i planskim dokumentima)**

Ministarstvo prati realizaciju aktivnosti i zadataka koji su uređeni ovom uredbom, te nakon donošenja strateških i planskih dokumenata predviđenih Zakonom, ili njihovih naknadnih izmjena, predlaže Vladi Federacije izmjene i dopune ove uredbe radi usklađivanja sa njihovim sadržajem.

### **Član 34.**

#### **(Stupanje na snagu)**

Ova uredba stupa na snagu osmog dana od dana objavljivanja u "Službenim novinama Federacije BiH".